

## Tratamento

E tratamento di un psicosis y di sensibilidad psicotico ta depende di e causa. Si droga ta e causa hopi biaha ta suficiente pa **stop cu droga** y e psicosis anto lo mester desaparece di su mes. Den otro forma di psicosis **medicacion** hopi biaha ta necesario pa trece trankilidad den e cerebro atrobe. E medicacion aki ta percura cu e sustancianan den e cerebro ta bin den balansa atrobe. Ta trata di e asina yama 'antipsicotico'. Si bo no ta cuminza cu medicacion e psicosis por ta presente keto bay, hasta por ta cronico. Hiba un bida normal anto ta bira practicamente imposibel.

Ora e psicosis desaparece, lo mester analisa kico por haci pa reduci e probabilidad di un psicosis nobo. Si un psicosis ta bolbe cada biaha ta consehabel pa usa medicacion di mantenimiento: un dosis mas abao posibel di antipsicotico pa preveni psicosis nobo. Tambe mester evita mas tanto posibel cosnan cu ta aumenta e probabilidad di un psicosis .

Ehempel di e tipo di factornan di riesgo ta:

- Falta di sueño.
- Stress.
- Uso di droga.

Mas tanto ta logra bon pa un psicosis bay y pa haya un manera pa tene e probabilidad di un psicosis nobo mas chikito posibel. Hopi biaha, pa logra esaki, ta necesario un tratamiento di diferente profesional, manera un combinacion di un psiquiatra, un psicologo y un enfermero.

## Mas Informacion

### FUNDACION SALUD MENTAL ARUBA RESPALDO

Mahuma 54  
Oranjestad, Aruba

(+297) 281 5000  
info@respaldo.aw

[www.respaldo.aw](http://www.respaldo.aw)



RESPALDO  
fsma

# Fundacion Salud Mental Aruba RESPALDO



## TRASTORNO PSIKICO

### Informacion general



# Trastorno Psikico

Psicosis ta aparece, tambe na Aruba, frecuentemente. Un psicosis ta realmente un sintoma di un problema scondi su tras. Tin biaha nos sa kico e problema oculto ey ta, tin biaha no. Un persona cu un psicosis ta hopi malo y casi semper mester tratamiento inmediato.

Den un psicosis tin un problema den e cerebro. Pasobra cierto sustancia ta for di balansa ta surgi tur tipo di trastorno den e funcionnan normal di e cerebro. Mester imagina cu e cerebro ta un organo sumamente potente den cual ta determina kico nos ta sinti, kico nos ta pensa y kico nos ta haci. Si e organo aki ta for di balansa hopi cos por bay robes.



# Sintoma

**Sintomanan frecuente di un psicosis ta:**

- **Halucinacionnan:** e cerebro ta kere, sin hustificacion, cu nos sentidonan percibi algo. E persona ta scucha sonido (hopi biaha voz), ta mira algo, ta sinti algo o hasta por hole algo. Pero, tur e cosnan ey en realidad no t'ey. E persona mes sin embargo no por distingui e observacionnan erroneo aki, di realidad.

- **Ilusionan:** pa via di problema cu pensa, pa via di halucinacion y problema pa por reconoce ainda loke ta berdad y kico no, hende por haya idea cu no ta cuadra cu realidad. Hende por ehempel ta convenci cu nan ta wordo persigui, cu hende kier haci nan daño, o cu cierto mensahe den noticia ta dirigi specialmente pa nan. Ilusion por percibi tur forma cu bo por pensa, cu algo ta sospechoso te na sumamente straño. Pero pa tur ilusion ta conta pa e pacient como e realidad.

- **Pensamento caotico:** pasobra e cerebro no ta logra mas pa structura e pensamentonan bon y pa concentra bon, tur pensamiento y impulso ta cuminsa pasa den otro. E ta bira un caos. Pesey hende no por pensa bon mas, ta bira 'druk den nan cabez' y hende ta cuminsa papia bruha.

# Causa

Manera a caba di bisa, psicosis realmente ta sintoma di un afectacion scondi. Algun causa di psicosis cu ta surgi frecuentemente ta:

- **Schizofrenie (esquizofrenia):** e termino aki realmente ta anticua y ta cada vez menos den uso. Awor nos ta prefera di papia di **sensibilidad pa psicosis**, unda realmente bo ta indica cu e persona aki por haya problema psicotico masha facil. Den caso di un imagen clasico di esquizofrenia un persona tin problema cu psicosis cu ta keda bolbe banda di cu e tin problema di poco energia, no tin motivacion pa haci cierto cos y menos interes den cos. Hende hopi biaha ta bira lento y riba nan mes. Ta trata anto di un imagen cronico cu por bira cada vez mas grave tambe. Si un hende tin problema so di sensibilidad pa psicosis (y pues no tin esquizofrenia) anto e no mester necesariamente bira mas grave cu tempo y den cierto caso e por pasa tambe.

- **Uso di droga:** bao influencia di mayoria di droga hende por bira psicotico. Con facil bo por bira psicotico di droga ta depende di bo predisposicion.

- **Trastorno bipolar:** si hende cu un trastorno bipolar bira maniaco anto na e climax di nan mania por haya problema psicotico tambe. Esey bo no ta yama di berdad un psicosis pero bo ta yam'e un mania cu característica psicotico.